

四庫全書

集部

欽定四庫全書

集部

石倉歷代詩選卷一百一十五

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣孫球

謄錄監生臣李炎

欽定四庫全書

石倉歷代詩選卷一百一

明 曹學佺 編

晚唐二十八

王貞白

字有道
信州人

長安道

曉鼓人已行暮鼓人未息
梯航萬國來爭先貢金帛不
問賢與愚但論官與職
如何貧書生苦獻安邊策

洛陽道

喧喧洛陽陌奔走爭先步惟恐著鞭遲誰能更迴顧覆
車雖在前潤屋何曾懼賢哉只二疏東門挂冠去

放歌行

南渡洛陽津西望十二樓明堂坐天子月朔朝諸侯清
樂動千門皇風被九州慶雲從東來決漭抱日流昇平
貴論道文墨將何求有詔徵草澤微誠將獻謀冠冕如
星羅拜揖曹與周望塵非吾事入職且遲留幸蒙國士

識自脫負薪裘今者放歌行以慰梁甫愁位榮數斗祿
奉義本豈羞願得金膏遂飛雲亦可籌

擬塞外征行

寇騎滿雞田都護欲臨邊青泥方絕漠懷劔始辭燕旌
旗挂龍虎壯士募鷹鷂長城威十萬高嶺奮三十行行
向馬邑去去指祁連鼓聲遙斥塞兵氣遠衝天對陣雲
初上臨城月始懸風驚烽易滅沙暗馬難前恩重恒思
報心勞屢損年微功一可立身輕不自憐

田舍曲

古今利名路只在儂門前至老不離家一生常晏眠牛
羊晚自歸兒童戲野田豈思封侯貴惟只待豐年征賦
豈辭苦但願時官賢官府苟貪濁田舍生憂煎

少年行

遊讌不知厭杜陵狂少年花時輕暖酒春服薄裝綿戲
馬上林苑鬪雞寒食天魯儒甘被笑對策髯皤然

其二

弱冠投邊急驅兵夜渡河
追奔鐵馬走殺虜寶刀訛威
靜黑山路氣含清海波常聞為突騎
天子賜長戈

長門怨

葉落長門靜苔生永巷幽
相思對明月獨坐向空樓
鳳吹終難轉蛾眉祇自愁
昭陽歌舞伴此夕未知秋

湘妃怨

舜欲省蠻陬南巡非逸遊
九疑沈白日二女泣滄洲
目極楚雲斷恨深湘水流
至今聞鼓瑟咽絕不勝愁

古悔從軍行

憶昔仗孤劔十年從軍威論兵親玉帳逐虜過金微隴
水秋先凍關雲暝不飛辛勤功業在麟閣志多違

有所思

芙蓉出水時偶爾便分離自此無因見長教挂所思殘
春不入夢芳信欲傳誰寂寞秋堂下空吟小謝詩

出塞

玉殿論兵事君王詔出征新除羽林將曾破月支兵慣

歷塞垣險能分部落情從今一戰勝不使虜塵生

出自薊北門行

薊北連極塞寒色晝冥冥戰地骸骨滿長時風雨腥沙
河流不定春草凍難青萬戶封侯者何謀靜虜庭

塞上曲

歲歲但防虜西征早晚休匈奴不繫頸漢將但封侯夕
照低烽火寒笳咽戍樓燕然山上字男子見須羞

又

誰唱關西曲寂寞夜景深一聲長在耳萬恨重經心調
古清風起曲終涼月沈却應筵上客未必是知音

曉泊漢陽渡

落月臨古渡武昌城未開殘燈明市井曉色辨樓臺雲
自蒼梧去江從嶓冢來芳洲號鸚鵡用記禰生才

隨計

徒步隨計吏辛勤髮易凋歸期無定日鄉思羨迴潮曷
雨投前驛侵屋過斷橋何堪穆陵路霜葉更瀟瀟

宮池產瑞蓮

雨露及萬物嘉祥有瑞蓮香飄雞樹近榮占鳳池先聖
日臨雙麗恩波照並妍願同指佞草生向帝堯前

金陵懷古

恃險不種德興亡歎數窮石城幾換主天塹謾連空御
路疊民塚臺基聚牧童折碑猶有字多記昔英雄

經故洛城

下世何久遠由來仰聖明山河徒自壯周召不長生幾

主崇姦詢諸侯事戰爭但餘崩壘在今古共傷情

金陵

六代江山在繁華古帝都亂來城不守戰後地多蕪寒
日隨潮落歸帆與鳥孤興亡多少事回首一長吁

秋日旅懷寄右省鄭拾遺

永夕愁不寐草蟲喧客庭半窗分曉月當枕落殘星
髮遊梁白家山近越青知音在諫省苦調有誰聽

贈劉凝評事

棘寺官初罷梁園靜掩扉春深顏子巷花映老萊衣談
史曾無滯攻書已造微卽膺新寵命稱慶向庭闈

御溝水

一帶御溝水綠槐相蔭清此泉涵帝澤無處濯塵纓烏
道來雖險龍池到自平朝宗本心切願向急流傾

商山

商山名利路夜亦有人行四皓卧雲處千秋壘蘚生畫
烟籠澗黑殘雪隔林明我待酬恩了來聽水石聲

終南山

千山凝黛色今古滿長安地去王都近人謀隱適難水
穿諸苑過雪照一城寒為問紅塵裏誰同駐馬看

廬山

嶽立鎮南楚雄名天下聞五峰高闕日九疊翠連雲夏
谷冰猶在陰巖畫不分惟應高與華清峻得為羣

送友人南歸

南國菖蒲老知君憶釣船離京近殘暑歸路有新蟬峴

首白雲起洞庭秋月懸若教吟興足西笑是何年

送馬明府歸山

辭秩入匡廬重修靖節居免遭黃綬束空與白雲疎送
吏各獻酒羣兒自擔書到時看瀑布為我謝清虛

送韓從事歸本道

獻捷靈州倅歸時寵拜新論邊多稱旨許國誓亡身馬
渴黃河凍雁回青塚春到蕃惟促戰應不肯和親

雲居長老

巘路躡雲上來叅出世僧松高半巖雪竹覆一溪水不
說有為法非傳無盡燈了然方寸內應祇見南能

折楊柳

枝枝交影鎖長門嫩色曾沾雨露恩鳳輦不來春欲盡
空留鶯語到黃昏

其二

水殿年年占早芳柔條風裏御爐香如今萬乘多巡狩
輦路無陰綠草長

折柳行

嫩葉初齊不耐寒
和寒時拂玉欄
干征人去日曾攀折
泣雨傷春翠黛殘

聶夷中

字坦之
河東人

公子行

漢代多豪族
恩深益驕逸
走馬踏殺人
街吏不敢詰
紅樓宴清春
數里望雲蔚
金缸焰勝畫
不畏落暉疾
美人盡如月
南威莫能足
芙蓉自天來
不向水中出
飛瓊奏

雲和碧簫吹鳳質惟恨魯陽死無人駐白日

勸酒

白日無定影清江無定波人無百年壽百年復如何堂
上陳美酒堂下列笙歌與君入醉鄉醉鄉樂天和歲歲
松柏茂日日丘陵多君看終南山萬古青峩峩

其二

灞上送行客聽唱行客歌適來橋下水已作渭川波人
間榮樂少四海別離多但恐別離淚自成苦水河勸爾

一杯酒所贈無餘多

飲酒樂

日月似有事一夜行一周草木猶須老人生得無愁一
飲解百結再飲破百憂白髮欺貧賤不入醉人頭我願
西江水盡向杯中流安得阮步兵同入醉鄉遊

短歌行

八月木陰薄十葉三墮枝人生過五十亦已同此時朝
出東郭門嘉樹鬱參差暮出西郭門原草已離披南隣

好臺榭北隣善歌吹榮華忽銷散四顧令人悲生死與榮辱四者乃常期古人耻其名沒世無人知

題賈氏林泉

市朝束名利林泉繫清通豈知黃塵內迥有白雲蹤輕流逗密篠直幹入穹空高吟五君詠疑對九華峰我知種竹心欲扇清涼風我知決泉意將明濟物功有琴不張絃衆星列梧桐須知澹泊聽聲在無聲中地非樵者路武陵又何逢祗慮迷所歸池上日西東

過比干墓

殷辛帝天下厭為天下尊乾綱既一斷賢愚無二門佞
是福身本忠作喪已源日影不入地下埋冤死魂余來
過此鄉下馬弔此墳靜念君臣間有道誰敢論

早發鄴北經古城

微月東南雙牛耕古城但耕古城地不知古城名當
昔置此城豈料今日耕蔓草已離披狐兔何縱橫秋雲
零落散秋風蕭條生對古良可歎念今轉傷情古人已

冥冥今人又營營不知馬蹄下誰家舊臺亭

贈農

勸爾勤耕田盈爾倉中粟勸爾無伐桑減爾身上服清
霜一委地萬草色不綠狂風一飄林萬葉不著木青春
如不耕何以自拘束

客有進歎後時者作詩勉之

後達多晚榮速得多疾傾君看構大厦何曾一日成在
煖須在桑在飽須在耕君子貴弘道道弘無不亨太陽

垂好光毛髮悉見形我亦二十年直似戴盆行荆山產
美玉石皆堅貞未必盡有玉玉且間石生精衛一微
物猶恐填海平

秋夕

日往無復見秋堂暮仍學玄髮不知白曉入寒銅覺為
材未離羣有玉猶在璞誰把碧桐枝刻作雲門樂

哭劉家博士

出門四顧望此日何徘徊終南舊山色夫子安在哉原

野多丘陵累累如高臺君墳雖數尺誰能與之偕

送友人歸江南

皇州五更鼓月落西南維此時有行客別我孤舟歸上
國身無主下第誠可悲

訪嵩陽道士不遇

先生五岳遊文焰滅金鼎日下鶴過時人間空落影常
言一粒藥不隨死生境何當列禦寇去問仙人請

烏夜啼

衆鳥各歸枝烏爾不棲還應知妾恨故向綠窗啼

古別離

欲別牽郎衣問郎遊何處不恨歸來遲莫向臨邛去

裴說

馬上行

極目望空濶馬羸程又賒月生方見樹風定始無沙
楚水辭魚窟燕山到雁家如斯名利役爭不老天涯

漢南郵亭

高閣水風清開門日送迎帆張獨鳥起樂奏大魚驚驟
雨拖山過微風拂面生閒吟雖得句留此謝多情

過洞庭湖

浪高風力大挂席亦言遲及到堪憂處爭如未濟時魚
龍侵莫測雷雨動須疑此際無聊賴將何寄所思

旅中作

行路非不厭其如飢與寒投人言去易開口到貧難澤
國雲千片湘江竹一竿時明未忍別猶待計窮看

旅次衡陽

欲往幾經年今來意豁然江風長借客嶽雨不因天戲
鷺飛輕雪驚鴻叫亂絃晚秋紅藕裏十宿寄漁船

春早寄華下同人

正是花時節思君寢復興市沽終不醉春夢亦無憑岳
面懸青雨河心走濁水東門車馬路離恨鎮相仍

寄曹松

莫見苦吟遲吟遲髮亦絲平生憂不足五字病難醫山

卷一百一
暝雲橫處星稠月側時冥搜不可得惟有夜猿知

贈賓貢

惟君懷至業萬里信悠悠路向東溟出書從北闕投家
無一夜夢帆掛隔年秋髣髴爭禁得孤舟往復愁

中秋月

一歲幾盈虧當盈重此期幸無偏照處剛有不明時色
淨雲歸早光寒鶴睡遲相看吟未足皎皎下疎籬

對雪

大片長空舞出門，肌骨寒路岐平。即易溝壑滿，應難免
穴歸時。失禽枝宿處，乾豪家寧肯厭。五月畫圖看。

夏日即事

僻居門巷靜，竟日坐階墀。鵲喜還逢信，蛩吟不見詩。筍
抽通舊竹，梅墜立閒枝。此際無塵繞，僧來稱所宜。

冬日後作

寂寞掩荆扉，昏昏坐欲癡。事無前定處，愁有併來時。日
影纔添線，髭根已半絲。明庭正公論，應許苦心詩。

冬日作

糲食擁敗絮苦吟吟過冬稍寒人却健太飽事多慵樹
老生烟薄牆陰貯雪重安能只如此公道會相容

終南

九衢南面色蒼翠絕纖塵寸步有閒處百年無到人禁
林寒對望太華遠相親誰數羣峰徧烟籠瑞靄頻

華山上方

獨上上方頂立高聊稱心氣衝雲易白影落縣多陰有

雪草不死無風松自吟
會當求大藥他日復追尋

廬山瀑布

靜景憑高望光分疊嶂開
日飛空際雪暑退伏中雷過
去雲衝斷旁來燒隔廻
何當住峰下終歲絕塵埃

不出院僧

四遠叅尋徧修行却不行
屐中無片跡門外是前生
塔見移來影鐘聞過去聲
一齋長默坐應笑我營營

道林寺

獨立凭危欄高低落照間寺分一派水僧鎖半房山對
面浮世隔垂簾到老閒烟雲與塵土寸步不相關

兜率寺

水與天無極高連雲夢南僧居跨鳥道佛影照漁潭朽
枿雲斜映平蕪日半涵行行不得住回首望烟嵐

鹿門寺

鹿門山上寺突兀盡無塵到此修行者應非取次人鳥
過驚石磬日出礙金身何計生煩惱虛空是四

題岳州僧舍

喜到重湖北孤舟橫晚烟鷺銜魚入寺鷄接飯隨船松
檜君山迥菰蒲夢澤連與師吟論處秋水浸遙天

牡丹

數朶欲傾城安同桃李榮未曾貧處見不似地中生此
物疑無價當春獨有名遊蜂與蝴蝶來往自多情

詠鸚鵡

常貴西山鳥銜恩在玉堂語傳明主意衣拂美人香緩

步尋珠網高飛上畫梁
長安頻道樂何日從君王

鷺鷥

秋江清淺特魚過亦頻窺
却為分明極翻令所得遲
浴隈紅日色棲壓碧蘆枝
會共鷓侶翔翔應可期

薔薇

一架長條萬朶春
嫩紅深綠小窠勻
只應根下千年土
曾葬西川織錦人

春日石中竹

數竿蒼翠若龍形
峭拔須教此地生
無限野花開不得
半山寒色與春爭

岳陽兵火後題僧舍

十年兵火真多事
再到禪扉却破顏
惟有兩般燒不得
洞庭湖水老僧閒

石倉歷代詩選卷一百一

欽定四庫全書

石倉歷代詩選卷一百二

明 曹學佺 編

晚唐二十九

司空圖

字表聖
河中人

馮燕歌

魏中義士有馮燕，游俠幽并最少年。
避讐偶作滑臺客，嘶風躍馬來翩翩。
此時恰遇鶯花月，堤上軒車畫不絕。

兩面高樓語笑聲指點行人情暗結擲果潘郎誰不慕
朱門別見紅妝露故故推門掩不開似教歐軋傳言語
馮生敲鐙袖籠鞭半拂垂楊半惹烟樹間春鳥知人意
的的心期暗與傳傳道張嬰偏嗜酒從此春閨為我有
梁間客燕正相欺屋上鳴鳩空自鬪嬰歸醉卧非讐汝
豈知負過人懷懼燕依戶扇欲潛逃中在枕傍指令取
誰言狼戾心能忍待我情深情不隱迴身本謂取巾難
倒柄方知授霜办馮君撫劍即遲疑自顧平生心不欺

爾能負彼必相負假手他人復在誰窗間紅艷猶可掬
熟視花鈿情不足惟將大義斷胸襟粉頸初迴如切玉
鳳皇釵碎各分飛怨魄嬌魂何處追凌波如喚遊金谷
羞彼揶揄淚滿衣新人藏匿舊人起白晝喧呼駭隣里
誣執張嬰不自明貴免生前遭拷捶官將赴市擁紅塵
掉臂人來擗看人傳聲莫遣有冤濫盜殺嬰家即我身
初聞僚吏翻憂歎呵叱風狂辭不變縲囚解縛自猶疑
疑自夢中方脫免未死勸君莫浪言臨危不顧始知難

已為不平能割愛更將身命救深冤白馬賢侯賈相公
長懸金帛募才雄拜章朗讀馮燕罪千古三河激義風
黃河東注無時歇注盡波瀾名不滅為感詞人沈下賢
長歌更與分明說此君精爽知猶在長與人間留炯誠
鑄作金燕香作堆焚香酌酒聽歌來

江行二首

地濶分吳塞楓高映楚天
迴塘春盡雨方響夜深船行
紀添新夢羈愁甚往年
何時京洛路馬上見人烟

其二

初程風信好迴望失津樓日帶潮聲晚烟含楚色秋戍
旗當遠客島樹轉驚鷗此去非名利孤帆任白頭

長安贈王注

正下搜賢詔多君獨避名客來當意慙花發遇歌成樂
地留歡趣權門讓後生東方御閑駟園外好同行

寄李員外

危橋轉溪路經雨石叢荒幽瀑下仙果孤巢懸夕陽病

辭青瑣秘心在紫芝房更喜諧招隱詩家有望郎

寄鄭仁規

清才鄭小戎標的貴遊中萬里雲無侶三山鶴不籠香
和丹地暖晚著綵衣風榮路期經濟惟應在至公

寄考功王員外

喜聞三字耗野客是陪遊白鳥閒疎索青山日滯留琴
如高韻稱詩愧逸才酬更勉匡君志論思在獻謀

早春

傷懷同客處病眼即花朝草嫩侵沙短水輕著雨銷風
光知可愛容髮不相饒早晚丹丘去飛書首見招

上栢梯寺懷舊僧二首

雲根禪客居皆說舊無廬松日明金像山風響木魚依
棲應不阻名利本來疎縱有人相問材間懶拆書

其二

高鴉隔谷見路轉寺西門塔影蔭泉脉山苗侵曉痕鐘
疎含杳靄閣迴亘黃昏更待他僧到長如前信存

寄懷元秀上人

悠悠干祿利，草草廢漁樵。
身世堪惆悵，風騷頓寂寥。
高秋期步野，積雨放趨朝。
得句如相憶，莎齋且見招。

次韻和秀上人遊南五臺

中峰曾到處，題記沒蒼苔。
振錫傳深谷，翻經想舊臺。
危松臨砌偃，驚鹿薦溪來。
內殿評詩切，身名不並迴。

贈圓昉公

天階讓紫衣，冷格鶴猶卑。
道勝嫌名重，身閒覺老遲。
曉

香延宿火寒碧度高枝每說長松寺他年與我期

贈信美寺岑上人

巡禮諸方徧湘南似有緣焚香老山寺乞食向江船
紗碧籠名畫燈寒照淨禪我來能永日蓮漏滴寒泉

浙江二首

華下文離已隔河仍來此地避干戈山田漸廣猿時到
村舍新添燕亦多丹桂石楠宜並長秦雲楚雨暗相和
兒童粟熟迷歸路歸得仍隨牧豎歌

其二

西北鄉關近帝京，烟塵一片正傷情。
愁看地色連空色，靜聽歌聲似哭聲。
紅蓼滿村人不在，青山遶檻路難平。
從他烟棹更南唱，休向津頭問去程。

山中

全家與我戀孤岑，躡得蒼苔一徑深。
逃難人多分隙地，放生康大出寒林。
名應不朽輕山骨，地到忘機近佛心。
昨夜前溪驟雷雨，晚晴閒步數峰吟。

寄贈詩僧秀公

靈一心傳清塞心可公吟後礎公吟近來雅道相親少
惟仰吾師所得深好句未停無暇日舊山歸老有東林
冷曹孤宦甘寥落多謝携筇數訪尋

重陽日訪元秀上人

紅葉黃花秋景寬醉吟朝夕在樊川却嫌今日登山俗
且共高僧對榻眠別畫長懷吳寺壁宜茶偏賞雪溪泉
歸來童穉爭相笑何事無人與酒船

中秋

閒吟秋景外萬事覺悠悠此夜若無月一年虛過秋

閒步

幾處白烟斷一川紅樹時壞橋侵轍水殘照背村碑

春中

伏溜侵階潤繁花隔竹香嬌鶯方曉聽無事過南塘

獨望

綠樹連村暗黃花出陌稀遠波春草綠猶有水禽飛

漫題三首

亂後他鄉節燒殘故國春自憐垂白首猶伴踏青人
齒落傷情久心驚健忘頻蝸廬經歲客蠶市異鄉人
率怕人言謹閒宜酒韻高山林若無慮名利不難逃

河上二首

惓惓日將暮驅羸獨到莊沙痕傍墟落風色入牛羊
新霽田園處夕陽禾黍明沙村平見水深巷有鷗聲

即事

茶與添詩句天清瑩道心只留鶴一隻此外是空林

秦關

形勝今雖在荒涼恨不窮虎狼秦國破狐兔漢陵空

即事三首

宿雨川原霽憑高景物新波痕侵牧馬雲影帶耕人
明時那棄置多病自遲留疎磬和吟斷殘燈照卧坐
林鳥頻窺靜家人亦笑慵舊居留穩枕歸卧聽秋鐘

松滋渡

楚岫積鄉思茫茫歸路迷更堪斑竹驛初聽鷓鴣啼
牛頭寺

終南最佳處禪誦出青霄羣木澄幽寂疎烟汎次寥

偶書三首

哀謝當何懺惟因悔壯圖磬聲花外遠人影塔前孤
色變鶯雛長竿齊笋箨垂白頭身偶在清夏景還移
蜀妓敲成妙吳娃狎共纖晚妝留拜月卷上水精簾

雜題

驛步隄繁閣軍城鼓振橋鷗和湖雁下雪隔嶺梅飄

有感

燈影看鬚白牆陰惜草青歲闌悲物我同是冒霜瑩

歲盡

莫話傷心事投春滿髮霜殷勤共樽酒今歲只殘陽

牡丹

得地牡丹盛曉添龍麝香主人猶自惜錦幕護春霜

春山

可是武陵溪春著處迷花明催曙早雲膩惹空低

樂府

寶馬跋塵光雙池照路傍喧傳報戚里明日幸長楊

鸚

不是流鶯獨占春林間彩翠四時新應知擬上屏風畫
偏坐橫枝亦向人

革下

故國春歸未有涯小欄高檻別人家五更惆悵回孤枕

猶自殘燈照落花

涪陽渡

楚田人立帶殘暉
驛迴村幽客路微
兩岫蘆花正蕭颯
渚烟深處白牛歸

寓居有感

不放殘年却到家
銜杯懶更問生涯
河隄往往人相送
一曲晴川隔蓼花

黑鬚寄在白鬚生
一度秋風減幾莖
客處不堪頻送別

無多情緒更傷情

閒夜

此身閒得易為家業是吟詩與看花若使他生拋筆硯
更應無事老烟霞

送道者

殷勤不為學燒金道侶惟應識此心雪裏千山訪君易
微微鹿迹入深林

重陽阻雨

重陽阻雨獨銜杯移得山家菊未開猶勝登高閒望斷
孤烟殘照馬嘶回

九月八日

已是人間寂寞花解憐寂寞傍貧家老來不得登高看
更甚殘春惜歲華

移桃栽

獨臨宮路易傷催從遣春風恣意開禪客笑移山上看
流鶯直到檻前來

樂府

五更窗下簇妝臺已怕堂前阿母催
滿鴨香薰鸚鵡睡
隔簾燈照牡丹開

燈花

蜀柳絲絲幕畫樓窗塵滿鏡不梳頭
幾時金雁傳歸信
剪斷香魂一縷愁

華下對菊

清香裛露對高齋
汎酒偏能浣旅懷
不似春風逞紅艷

鏡前空墜玉人釵

與伏牛長老偈二首

不算菩提與闍提
惟應執著便生迷
無端指箇清涼地
凍殺胡僧雪嶺西

長繩不見繫空虛
半偈傳心亦未疏
推倒我山無一事
莫將文字縛真如

石楠

客處偷閒未是閒
石楠雖好懶頻攀
如何風葉西歸路

吹斷寒雲見故山

携僊錄

嶽北秋空渭北川
晴雲漸薄薄如烟
坐來還見微風起
吹散殘陽一片蟬

狂題

別鶴淒涼指法存
戴逵能耻近王門
世間第一風流事
借得王公玉枕痕

由來相愛只詩僧
怪石長松自得朋
却怕他生還識字

依前日下作孤燈

芭蕉叢畔碧嬋娟
免更悠悠擾蜀川
應到去時題不盡
不勞分寄校書箋

十年三署讓官頻
認得無才又索身
莫道太行同一路
大都安穩屬閒人

漫書

長擬求閒未得閒
又勞行役出秦關
逢人漸覺鄉音異
却恨鶯聲似故山

溪邊隨事有桑麻
盡日山程十數家
莫怪行人頻悵望
杜鵑不是故鄉花

丑年冬

醉日昔聞都下酒
如今喜折新茶不堪病渴仍多慮
好向滄湖便出家

扇

珍重逢秋莫棄捐
依依只仰故人憐
有時池上遮殘日
承得霜林幾箇蟬

力疾山下吳村看杏花

此身衰病轉堪嗟
長恐春寒獨惜花
更恨新詩無紙寫
蜀箋堆積是誰家

歌者

不是新聲唱不新
旋調玉管旋生春
愁腸隔斷珠簾外
只為今宵共聽人

楊柳枝

灞亭東去徹隋堤
贈別何須醉似泥
萬里往來無一事

便帆輕拂亂鶯啼

桃源仙子不須誇
聞道惟栽一片花
何似浣紗溪畔住
綠陰相間兩三家

大堤時節近清明
霞襯烟籠遠郡城
好是梨花相映處
更勝松雪日初晴

喜山鵲

翠衿紅嘴便知機
久避重羅穩處飛
只為從來偏護惜
窗前今賀主人歸

洛中

秋風團扇未驚心
笑看妝臺落葉侵
繡鳳不教金縷暗
青樓何處有寒砧

不用頻嗟世路難
浮生各自繫悲歡
風霜一夜添羈思
羅綺誰家待早寒

贈日東鑿禪師

故國無心渡海潮
老禪方丈倚中條
夜深雨絕松堂靜
一點飛螢照寂寥

短歌行

鳥飛飛兔蹶蹶朝來暮去催時節
女媧只解補青天不解煎膠粘日月

韋莊

字端已
杜陵人

乞彩牋歌

浣花溪上如花客綠閣紅藏人不識
留得溪頭瑟瑟波
潑成紙上猩猩色手把金刀裁綵雲
有時剪破秋天碧
不使紅霓段段飛一時馳上丹霞壁
蜀客才多染不供

卓文辭後開無力孔雀銜來向日飛翩翩壓折黃金翼
我有歌詩一千首磨礪山岳羅星斗開卷長疑雷電驚
揮毛只怕龍蛇走班班布在時人口滿軸松花都未有
人間無處買烟霞須知得自神僊手也知價重連城璧
一紙萬金猶不惜薛濤昨夜夢中來殷勤勸向君邊覓

章臺夜思

清瑟怨遙夜遠弦風雨哀孤燈聞楚角殘月下章臺芳
草已云暮故人殊未來鄉書不可寄秋雁從南來

夏夜

傍水逸書榻開襟納夜涼
星繁愁晝熟露重覺荷香
蛙吹鳴還息蛛羅滅又光
正吟秋興賦桐影下西墻

愁

避愁愁又至愁至事難忘
夜作心中火朝為鬢上霜
不經公子夢偏入旅人腸
借問高軒客何鄉是醉鄉

村居書事

年年耕與釣鷗鳥已相依
砌長蒼苔厚藤抽紫蔓肥
風

鶯移樹轉雨燕入樓飛不覺春光暮
遠籬紅杏稀

賊中與蕭韋二秀才同卧重疾二君尋愈余獨

加焉恍惚之中因有題

與君同卧疾獨我漸彌留弟妹不知處
兵戈殊未休胸中疑晉豎耳下鬪殷牛
縱有秦醫在懷鄉亦淚流

宿家山

山行侵夜到雲竇一星燈草動蛇尋穴
枝搖鼠上藤背風開藥竈向月展魚罾
明日前溪路烟蘿更幾層

和人歲晏旅舍見寄

積雪滿前除寒光夜皎如老憂新歲近貧覺故交疎
意合論文後心降得句初莫言常鬱鬱天道有盈虛

潁陽縣

琴堂連小室故事即僊蹤樹老風聲壯山高臘候濃雲
多庭有鹿縣僻寺無鐘何處留詩客茆簷倚後峰

贈薛秀才

相辭因避世相見尚兵戈亂後故人少別來新話多但

聞哀痛詔未覩凱旋歌欲結巖栖伴何山有薜蘿

題許僊師院

地古多喬木遊人到且吟院開金鎖澀門映綠篁深山
色不離眼鶴聲長在琴往來誰與慣乳鹿住前林

哭麻處士

却到歌吟地閒門草色中百年流水盡萬事落花空總
帳扃秋月詩樓鏤夜蟲少微何處墜留恨白楊風

春愁

寓思本多傷逢春恨更長
露霑湘竹淚華墜越梅妝
睡怯交加夢閒傾潑灑
觴後庭人不到斜月上松篁

晚春

華開疑乍富華落似初貧
萬物不如酒四時惟愛春
峨峨秦氏髻皎皎洛川神
風月應相笑年年醉病身

潤州顯濟閣曉望

清曉水如鏡隔江人似鷗
遠烟藏海島初日照揚州
地壯孫權氣雲凝庾信愁
一蓬何處客吟凭釣魚舟

寓言

為儒逢世亂吾道欲何之
學劍已應晚歸山今又遲
故人三載別明月兩鄉悲
惆悵滄江上星星鬢有絲

婺州和陸諫議將赴闕懷陽羨山居

望闕路仍遠子牟魂欲飛
道開燒藥鼎僧寄卧雲衣
故國饒芳草他山挂夕暉
東陽雖勝地王粲奈思歸

建昌渡暝吟

月照臨官渡鄉情獨浩然
鳥栖彭蠡樹月上建昌船
市

散漁翁醉樓栖賈客眠隔江何處笛吹斷綠楊烟

婺州水館重陽日作

異國逢佳節憑高獨苦吟一杯今日酒萬里故鄉心水
館紅蘭合山城紫菊深白衣雖不至鷗鳥自相尋

避地越中作

避世越家遠天涯歲已周豈知今夜月還是去年愁露
果珠沈水風螢燭上樓傷心潘騎省華髮不禁秋

信州谿岫夜吟作

夜倚臨谿店懷鄉獨苦吟月當山頂出星倚水湄沈霧
氣漁燈冷鐘聲谷寺深一城人悄悄琪樹宿仙禽

齊安郡

弭棹齊安郡孤城百戰殘傍村林有虎帶郭縣無官暮
角梅花怨清江桂影寒黍離緣底事撩我起長歎

延興門外作

芳草五陵道美人金轡車綠奔穿內水紅落過墻華馬
足倦遊客鳥聲歡酒家王孫歸去晚宮樹欲栖鴉

和李秀才郊墅早春吟興十韻

暖律變寒光東君景漸長
我悲遊海嶠君說住柴桑
雪色隨高嶽冰聲陷古塘
草根微吐翠梅架半含霜
酒市多逋客漁家足夜航
匡廬雲傍屋彭蠡浪衝牀
綠擺楊枝嫩紅挑菜甲香
鳳皇池已盡鸚鵡賦應狂
佇見龍辭沼寧憂雁失行
不應雙劍氣長在斗牛傍

下第題青龍寺僧房

千蹄萬轂一枝芳
要路無媒果自傷
題柱未期歸蜀國

曳裾何處謁吳王
馬嘶春陌金羈鬧
鳥睡華林繡羽香
酒薄恨濃消不得
却將惆悵問支郎

柳谷道中作却寄

馬前紅葉正紛紛
馬上離情斷殺魂
曉發獨辭殘月店
暮程遙宿隔雲村
心如嶽色留秦地
夢逐河聲出禹門
莫怪苦吟鞭拂地
有誰傾蓋待王孫

歎落花

一夜霏微露濕烟
曉來如淚喪嬋娟
不隨殘雪埋芳草

盡逐香風上舞筵
丙子去時遺笑靨
謝娥行處落金鈿
飄紅墜白堪惆悵
少別穠華又隔年

題盤豆驛水館後軒

極目晴川展畫屏
地從桃塞接浦城
灘頭鷺占清波立
原上人侵落照耕
去雁數行天際沒
孤雲一點淨中生
憑軒盡日不回首
楚水吳山無限情

貴公子

大道青樓御苑東
玉欄僊杏壓枝紅
金鈴犬吠梧桐院

朱鬢馬嘶楊柳風流水帶華穿巷陌夕陽和樹入簾櫳
瑤池宴罷歸來醉笑說君王在月宮

夜景

滿庭松桂雨餘天宋玉秋聲韻蜀絃烏兔不知多事日
星辰長似太平年誰家一笛吹殘雪何處雙砧搗暮烟
欲把傷心問明月素娥無語淚涓涓

長年

長年方語少年非人道新詩勝舊詩十畝野塘留客釣

一軒春雨對僧棋
花間醉任黃鶯說
亭上吟從白鷺窺
大盜不將爐冶去
有心重築太平基

辛丑年

九衢漂杵已成川
塞上黃雲戰馬閒
但有羸兵填渭水
更無竒士出商山
田園已沒紅塵裏
弟妹相逢白刃間
西望翠華殊未返
淚痕空濕劍文斑

憶昔

昔年曾向五陵遊
子夜歌清月滿樓
銀燭樹前長似畫

露桃華裏不知秋西園公子名無忌南國佳人號莫愁
今日亂離俱是夢夕陽惟見水東流

贈邊將

昔因征遠向金微馬出榆關一鳥飛萬里只携孤劍去
十年空逐塞鴻歸手招都護新降虜身著文皇舊賜衣
只待烟塵報天子滿頭霜雪為兵機

春日

忽覺東君景漸遲野梅山杏暗芳菲落星樓上吹殘角

墀月營中挂夕暉
旅夢亂隨蝴蝶散
離魂漸逐杜鵑飛
紅塵遮斷長安陌
芳草王孫暮不歸

早秋夜作

翠簾初清暑半銷
撇簾松韻送風颭
莎庭露永琴書潤
山郭月明砧杵遙
傍砌綠苔鳴蟋蟀
遶簷紅樹織蟪蛄
不須更作悲秋賦
王粲辭家鬢已周

過舊宅

華軒不見馬蕭蕭
廷尉門人久寂寥
朱檻翠樓為卜肆

玉欄僊杏作春樵階前雨落鴛鴦瓦竹裏苔封蟬竦橋
莫問此中銷歇事娟娟紅淚泣芭蕉

觀軍迴戈

關中羣盜已心離關外猶聞羽檄飛御苑綠莎嘶戰馬
禁城寒月擣征衣漫教韓信兵塗地不及劉琨嘯解圍
昨日屯軍還夜遁滿車空載洛神歸

洛北村居

十畝松篁百畝田歸來方屬大兵年巖邊石室低臨水

雲外嵐峰半入天，烏勢去投金谷樹。鐘聲遙出上陽烟，
無人說得中興事。獨倚斜暉憶仲宣。

聞再幸梁洋

纔喜中原息戰聲，又聞天子幸巴西。延燒魏闕非關燕，
大狩陳倉不為雞。興慶玉龍寒自躍，昭陵石馬夜空嘶。
遙思萬里行宮夢，太白山前月欲低。

過揚州

當年人未識兵戈，處處青樓夜夜歌。花發洞中春日永，

月明衣上好風多
淮王去後無雞犬
煬帝歸來葬綺羅
二十四橋空寂寂
綠楊摧折舊官河

過內黃縣

相州吹角欲斜陽
疋馬搖鞭宿內黃
僻縣不容投刺客
野陂時遇射鵰郎
雲中粉堞新城壘
店後荒郊舊戰場
猶指去程千萬里
秣陵烟樹在何鄉

江上題所居

故人相別盡朝天
苦竹江頭獨閉關
落日亂蟬蕭帝寺

碧雲歸鳥謝家山青州從事來偏熟泉布先生老漸慳
不是對花長酩酊永嘉時代不如閒

婺州屏居蒙右省王拾遺車枉降訪病中延候
不得因成寄謝

三年流落卧漳濱王粲思家拭淚頻畫角莫吹殘月夜病
心方憶故園春自為江上樵蘇客不識天邊侍從臣怪
得白鷗驚去盡綠蘿門外有朱輪

袁州作

家家生計只琴書一郡清風似魯儒
山色東南連紫府水聲西北屬洪都
烟霞盡入新詩卷郭邑閒開古畫圖
正是江村春酒熟更聞春鳥勸提壺

謁巫山廟

亂猿啼處訪高唐露入烟霞草木香
山色未能忘宋玉水聲猶似哭襄王
曰朝曰暮陽臺下為雨為雲楚國荒
惆悵廟前無限柳春來空闌畫眉長

鷓鴣

南禽無侶似相依錦翅雙雙傍馬飛孤竹廟前啼暮雨
汨羅祠畔弔殘暉秦人只解歌為曲越女空能畫作衣
懊惱澤家非有恨年年長憶鳳城歸

黃藤山下聞猿

黃藤山下駐歸程一夜號猿弔旅情入耳便能生百恨
斷腸何必待三聲穿雲宿處人難見望月啼時兔正明
好笑五陵年少客壯心無事也沾纓

南昌晚眺

南昌城郭枕江烟
章水悠悠浪拍天
芳草綠遮僊尉宅
落霞紅襯賈人船
霏霏閣上千山雨
嘒嘒雲中萬樹蟬
怪得地多章句客
庾家樓在斗牛邊

桐廬縣作

錢塘江盡到桐廬
水碧山青畫不如
白羽鳥飛巖子瀨
綠簑人釣季鷹魚
潭心倒影時開合
谷口閒雲自卷舒
此境只應詞客愛
投文空弔木玄虛

夏口行寄婺州諸弟

迴頭烟樹各天涯
婺女星邊遠寄家
盡夜楚波連夢澤
滿衣春雪落江華
雙雙得伴爭如雁
一一歸巢却羨鴉
誰道我隨張博望
悠悠空外泛仙槎

郭杜舊居

却到山陽事事非
露雲溪鳥尚相依
阮咸貧去田園盡
向秀歸來父老稀
秋雨幾家紅稻熟
野塘何處錦鱗肥
年年為獻東堂策
長是蘆花別釣磯

庭前桃

曾向桃源爛熳遊也同漁父汎仙舟皆言洞裏千株好
未勝庭前一樹幽帶露似垂湘女淚無言如伴息鳩愁
五陵公子饒春恨莫引香風上酒樓

汧陽閣

汧水悠悠去似緋遠山如畫翠眉橫僧尋野渡歸吳嶽
雁帶斜陽入渭城邊靜不收蕃帳馬地貧惟賣隴山鷓
牧童何處吹羌笛一曲梅花出塞聲

古離別

晴烟漠漠柳鬢鬢不那離情酒半酣更把玉鞭雲外指
斷腸春色在江南

立春日作

九重天子去蒙塵御柳無情依舊春今日不關妃妾事
始知辜負馬嵬人

白櫻桃

王母階前種幾株水精簾外看如無只應漢武金盤上
瀉得珊瑚白露珠

寄江南逐客

二年音信阻湘潭
花下相思酒半酣
記得竹齋風雨夜
對牀孤枕話江南

村笛

簫韶九奏韻淒鏘
曲度雖高調不傷
却見孤村明月夜
一聲牛笛斷人腸

殘花

和烟和露雪離披
金葉紅鬚尚滿枝
十日笙歌一宵夢

苧蘿因雨失西施

金陵圖

誰謂傷心畫不成
畫人心逐世人情
君看六幅南朝事
老木寒雲滿故城

臺城

江雨霏霏江草齊
六朝如夢鳥空啼
無情最是臺城柳
依舊烟籠十里堤

含山店夢覺作

曾為流離慣別家等閒揮袂客天涯燈前一覺江南夢
惆悵起來山月斜

送人遊并汾

風雨蕭蕭欲暮秋獨攜孤劍塞垣遊如今虜騎方南牧
莫問陰關第一州

江外思鄉

年年春日異鄉悲杜曲黃鶯可得知更被夕陽江畔上
斷腸烟柳一絲絲

江行西望

西望長安白日遙
半年無事駐蘭橈
欲將張翰秋江雨
畫作屏風寄鮑昭

宿篷船

夜來江雨宿篷船
卧聽淋鈴不忍眠
却憶紫微情調逸
阻風中酒過年年

衢州江上別李秀才

千山紅樹萬山雲
把酒相看日又曛
一曲離歌兩行淚

不知何地再逢君

焦岷閣

李白曾歌蜀道難長聞白日上青天今朝夜過焦岷閣
始信星河在馬前

石倉歷代詩選卷一百二

欽定四庫全書

石倉歷代詩選卷一百三

明 曹學佺 編

詠史詩

胡曾 長沙人

洞庭

五月扁舟過洞庭
魚龍出沒水雲腥
軒轅皇帝今何在
回首巴山蘆葉青

箕山

寂寂箕山春復秋更無人到此溪頭棄瓢巖畔中宵月
千古空聞屬許由

蒼梧

有虞龍駕不西還空委蕭韶洞府間無計得知陵寢處
愁雲長滿九疑山

湘川

虞舜南捐萬乘君靈妃揮涕竹成紋不知精魄遊何處

落日瀟湘空白雲

渭濱

岍草青青渭水流
子牙曾此獨垂鈎
當時未入非熊兆
幾向斜陽歎白頭

漢江

漢江一帶碧流長
兩岍春風起綠楊
借問膠船何處沒
欲停蘭棹祀昭王

瑤池

金
卷一
三
阿母瑤池宴穆王九天仙樂送瓊漿謾誇八駿行如電
歸到人間國已亡

褒城

恃寵驕多得自由驪山舉火戲諸侯祇知一笑傾人國
不覺胡塵暗玉樓

魯城

魯公城闕已丘墟荒草無由認玉除因笑臧孫非智者
東門鐘鼓祀鷄鷓

姑蘇臺

吳王恃霸棄雄才，貪向姑蘇醉醜醜。
一宵西送越兵來，不覺錢塘江上月。

章華臺

茫茫春草沒章華，因笑靈王昔日好奢臺。
土未乾，簫管絕，可憐身死野人家。

細腰宮

楚王辛苦戰無功，國破城荒霸業空。
惟有青春花上露，

至今猶泣細腰宮

陽臺

楚國城池颯已空
陽臺雲雨去無蹤
何人更有襄王夢

寂寂巫山十二重

荆山

抱玉巖前桂葉稠
碧溪寒水至今流
空山落日猿聲叫
疑是荆人哭未休

吳宮

草長黃池千里餘歸來宗國已丘墟出師不聽忠臣諫
徒耻窮泉見子胥

五湖

東上高山望五湖雲濤烟浪起天隅不知范蠡乘舟後
更有功臣繼踵無

摩笄山

春草綿綿岱日低山邊立馬看摩笄黃鶯也解追前事
來向夫人死處啼

黃金臺

北乘羸馬到燕然
此地何人復禮賢
欲問昭王無處所
黃金臺上草連天

馬陵

墜葉蕭蕭九月天
驅羸獨過馬陵前
路傍古木題書處
記得將軍破敵年

秦庭

楚國君臣草莽間
吳王戈甲未東還
包胥不動咸陽哭

爭得秦兵出武關

故宜城

武安南伐勒齊兵疎鑿功將夏禹并誰謂長渠千里後
蠻流猶入故宜城

夷門

六門冉冉驟朝昏魏國賢才杳不存惟有侯嬴在時月
夜來猶自照夷門

豫讓橋

豫讓酬恩歲已深高名不朽到如今年年橋上行人過
誰有當時國士心

成都

杜宇曾為蜀帝王化禽飛去舊城荒年年來叫桃花月
似向春風訴國亡

虞坂

悠悠虞坂路欹斜遲日和風簇野花未有孫陽身歿後
幾多騏驎困鹽車

易水

一旦秦皇馬角生
燕丹歸此送荆卿
行人欲識無窮恨
聽取東流易水聲

長城

祖舜宗堯自太平
秦皇何用苦蒼生
不知禍起蕭牆內
虛築防胡萬里城

沙丘

年年遊覽不曾停
天下山川欲徧經
堪笑沙丘纔過處

麋興風起鮑魚腥

滎陽

漢祖東征屈未伸
滎陽失律紀生焚
當時天下方龍戰
誰為將軍作誄文

沛中

漢高辛苦事干戈
帝業興隆俊傑多
猶恨四方無壯士
還鄉悲唱大風歌

柳縣

義帝南征路入郴國亡身死亂山深不知埋恨窮泉後
幾度西陵片月沈

烏江

爭帝圖王勢已傾八千兵散楚歌聲烏江不是無船渡
耻向東吳再起兵

垓下

拔山力盡霸圖隳倚劍長歌不逝驢明月滿營天似水
那堪回首別虞姬

霸陵

原頭日落雪邊雲，猶放韓盧逐兔羣。
況是四方無事日，霸陵誰識舊將軍。

谷口

百二秦關逐水流，虎爭龍戰為諸侯。
子真獨有烟霞趣，谷口耕鋤到白頭。

居延

漠漠平沙際碧天，問人云此是居延。
停驂一顧猶魂斷。

蘇武爭禁十九年

望思臺

太子銜冤去不迴
臨高徒築望思臺
至今漢武銷魂處
猶有悲風木上來

漢宮

明妃遠嫁泣西風
玉筋雙垂出漢宮
何事將軍封萬戶
却令紅粉為和戎

滹沱河

光武經營業未興王郎兵革暫憑陵須知後漢功臣力
不及滹沱一片冰

玉門關

西戎不敢過天山定遠功成白馬閒半夜帳中停燭坐
惟思生入玉門關

潁川

古賢高尚不爭名行止由來動杳冥今日浪為千里客
看花慙上德星亭

銅雀臺

魏武龍興逐逝波高臺空按望陵歌過雲聲絕悲風起
翻向樽前泣翠娥

西園

月滿西園夜未央金風不動鄴天涼高情公子多秋興
更領詩人入醉鄉

檀溪

二月襄陽綠草齊王孫相引過檀溪的盧何處埋龍骨

流水依前遠大堤

瀘水

五月驅兵入不毛
月明瀘水瘴烟高
誓將雄略酬三顧
豈憚征蠻七縱勞

金谷園

一自佳人墜玉樓
繁華東逐汴河流
惟餘金谷園中樹
殘日蟬聲送客愁

峴山

曉日登臨感晉臣古碑零落峴山春
松門飛露涓涓滴
酷似當初墮淚人

華亭

陸機西沒洛陽城吳國春風草又青
惆悵月中千歲鶴
夜來猶自唳華亭

東山

五馬南浮一化龍謝安入相此山空
不知携妓重來日
幾樹鶯啼谷口風

武陵溪

一溪春水白雲隣流出桃花片片新若道長生是虛語
洞中爭得有秦人

彭澤

英俊那甘屈下僚便裁門柳事蕭條鳳皇不逐雞羣食
莫怪先生懶折腰

金陵

侯景長驅十萬人可憐梁武坐蒙塵生前不得空王力

徒向金田自捨身

沙苑

馮翊南邊宿霧開
行人一步一徘徊
誰知此地凋殘柳
盡是高歡敗後栽

石城

古郢雲開白雪樓
漢江還遶石城流
何人知道寥天月
曾向朱門送暮愁

陳宮

陳國機權未有涯如何後主恣驕奢不知已入宮前井
猶自聽吹玉樹花

汴水

千里長河一旦開亡隋波浪九天來錦帆未落干戈起
惆悵龍舟更不迴

汪遵

蒼頡臺

觀跡成文代結繩皇風儒教浩然興幾人從此休耕釣

吟對長安雪夜燈

桐江

光武重興四海寧漢臣無不受浮榮嚴陵何事輕軒冕
獨向桐江釣月明

招隱

罷聽泉聲看鹿羣
丈人才策合匡君
早携書劍離巖谷
莫待蒲輪報白雲

細腰宮

鼓聲連日燭連宵貪向春風舞細腰爭奈君王正沈醉
秦兵江上促征橈

梁寺

立國從來為戰功一朝何事却談空臺城兵市無人敵
閒卧高僧滿梵宮

昇仙橋

題橋貴欲露先誠此日人皆笑率情應訝臨邛沽酒客
逢時還作漢公卿

招屈亭

三閭溺處殺懷王感得荆人盡縞裳
招屈亭邊兩重恨
遠天秋色暮蒼蒼

孫元晏

武昌

西塞山高截九垓童謠終日自相催
武昌魚美應難戀
江水須歸建業來

謝公賭墅

發遣將軍欲去時略無情撓只貪棋自從乞與羊曇後
賭豎功成更有誰

衛玠

叔寶羊車海內稀山家女婿好風姿江東士女無端甚
看殺玉人渾不知

放宮人

納諫廷臣免犯顏雄威自可霸江山姚興侍女方承寵
放出宮闈若等閒

烏衣巷

古迹荒基好歎嗟
滿川吟景只烟霞
烏衣巷在何人住
回首令人憶謝家

王方平

拂衣耕釣已多時
江上山前樂可知
著却貂裘將采藥
任他人喚作漁師

潘妃

曾步金蓮寵絕倫
豈甘今日委埃塵
玉兒還有懷恩處

不肯將身嫁小臣

梁分宮女

滌蕩齊宮法令新
分張宮女二千人
可憐無限如花貌
重見世間桃李春

庾信

苦心詞賦向誰談
淪落周朝志豈甘
可惜多才庾開府
一生惆悵憶江南

臨春閣

臨春高閣上侵雲風起香飄數里聞自是君王正沈醉
豈知消息報隋軍

後庭舞

嫵婉回風態若飛麗華翹袖玉為姿後庭一曲從教舞
舞破江山君未知

周曇

唐堯

祆氛不起瑞烟輕端拱垂衣日月明何事四方無外役

茅茨深處土階平

舜妃

瀟湘何代泣幽魂骨化重泉志尚存若使地中休下淚
不應新竹有啼痕

樂羊

杯羹忍啜得非忠巧佞胡為惑主聰盈篋謗書能寢却
中山不是樂羊功

范蠡

西子能令轉嫁吳會稽知爾啄姑蘇跡高塵外功成處
一葉翩翩在五湖

侯嬴朱亥

屠肆監門一賤微信陵交結國人非當時不是二君計
疋馬那能解趙圍

公孫述

劔蜀金湯孰敗爭子陽才業匪雄英方知在德不在險
危棧何曾阻漢兵

廢帝

亂兵如蝟走王師社稷顛危孰為持夜逐螢光尋道路
漢家天子步歸時

吳後主

吳宮季主恣驕奢移盡江南百媚花一旦狂風江上起
花隨風散落誰家

齊廢帝

定策誰扶捕鼠兒不憂蕭衍畏潘妃長圍既合刀臨項

猶惜金錢對落暉

獨孤后

腹生奚強有親疎
憐者為賢棄者愚
儲貳不遭讒構死
隋亡寧便在江都



石倉歷代詩選卷一百三